



P R O P O Z I C I J E
TAKMIČENJA ZA PRVENSTVO KANTONALNE LIGE
NS UNSKO-SANSKOG KANTONA ZA TAKMIČARSKU 2014/2015 .godinu

Bihać, august 2014.godine

Broj: 347/14
Bihać:19.08.2014.godine

Na osnovu člana 31 h) Statuta NS USK-a i člana 4.Pravilnika o nogometnim takmičenjima NS/FS BiH, Izvršni odbor na prijedlog Takmičarske Komisije NS USK-a,na sjednici održanoj dana 19.08..2014.godine, donosi

PROPOZICIJE
TAKMIČENJA ZA PRVENSTVO KANTONALNE LIGE NS USK-a
ZA TAKMIČARSKU 2014/2015.godinu

OPĆE ODREDBE

Član 1.

Ovim propozicijama utvrđuje se način i postupak sprovođenja takmičenja seniora na nivou Kantonalne lige Unsko-Sanskog kantona u takmičarskoj 2014/2015 godini, a organizator takmičenja je Nogometni savez Unsko-Sanskog kantona.

Član 2.

Prvenstvo nogometnih klubova NS USK-a za takmičarsku 2014/2015 godinu odvijat će se u okviru jedinstvene lige seniora.

Član 3.

U takmičenju za prvenstvo seniora NSUSK-a za takmičarsku 2014/2015 godinu sudjeluje do 14 /četrest/ klubova sa prostora Nogometnog saveza Unsko-Sanskog kantona.

USLOVI ZA UČESTOVANJE U TAKMIČENJU

Član 4.

Za učestovanje u takmičenju kantonalne lige pored ostalih,klubovi moraju ispunjavati slijedeće uslove:

Igrališta :

1. da posjeduje odgovarajuće igralište sa kvalitetnom travnatom plohom za igru ,sa prirodnom ili vještačkom podlogom dimenzija 100-110 m dužine i 64-75 m širine. Teren mora biti travnat cijelom površinom i potpuno ravan da bi omogućio normalno kretanje.Teren sa vještačkom podlogom u svemu mora odgovarati propisima FIFA-e sa kvaltetom travnjaka i odgovarajućim certifikatom koji je propisala i izdala FIFA.Teren za igru mora biti odvojen od gledališta žičanom (zatvorenom) ogradom odgovarajućeg kvaliteta. Ograda mora biti udaljena najmanje 2(dva) m od uzdužne linije igrališa i 3(tri) m od poprečne linije iza vrata (golova) u visini kaznenog prostora.Minimalna visina ograde je 120 cm.

2. Igralište mora posjedovati zaštitne kabine odgovarajućeg kvaliteta za rezervne igrače i stručno rukovodstvo ekipa za najmanje 13 (trinest) osoba i odvojenu kabinu za delegata utakmice,a sve zaštićene od kiše i vjetra.Kabine se postavljaju na uzdužnoj strani igrališta,propisno udaljene od terena za igru,odnosno uzdužne linije (2-3 m).

3. Na stadionu moraju postojati svlačionice za obje ekipe i posebna svlačionica za suce.Sve svlačionice trebaju imati mokre čvorove-kupatila sa toplom vodom,za igrače najmanje 3 (tri) tuš ruže,a kod sudaca 1(jedna) tuš ruža. Svaka svlačionica (sudijska posebno) treba imati zaseban WC.

4. Izlazak na teren i povrtak igrača u svlačionicu, stručnih rukovodstava ekipa,delegata i sudija mora biti obezbijeđen i odvojen od gledalaca.

5. Na stadionu treba biti posebna prostorija za sastavljanje zapisnika .

6. Uz teren ili na tribinama, za snimatelja utakmice, mora biti izrađeno uzvišeno mjesto minimalne visine 3,0 metra na poziciji središnje crte igrališta kako bi se mogao pokriti cijeli teren za snimanje.

Snimanje utakmica Kantonalne lige obvezno je sa uzvišenog mjesta koje je osigurano, fiksnom kamerom, na novoj video vrpici.

7. Igralište mora biti primljeno od nadležne Komisije za prijem igrališta i registrirano za odigravanje prvenstvenih utakmica. Zapisnik o prijemu-registraciji igrališta treba da je javno istaknut u prostoriji gdje se sačinjava Zapisnik utakmice.

OSTALI UVJETI

Član 5.

1. Klub mora isunjavati uvjete iz Normativa minimuma stručno-pedagoškog rada za mlađe kategorije nogometaša u osnovnim Nogometnim organizacijama.

2. **Da organizira nogometnu aktivnost sa takmičarskim ekipama predpionira (U-13), pionira (U-15), kadeta (U-17) i juniora (U-19) od kojih je obavezan da sa selekcijom pionira (U15) učestvuje u stalnom takmičenju koje organizira Nogometni savez Unsko-Sanskog kantona.**

3. Za prvenstvene utakmice klub domaćin, odnosno organizator obavezan je osigurati najmanje 3 /tri/ lopte, koje u svemu moraju odgovarati propisima Pravila nogometne igre. U slučaju da se utakmica igra po snijegu- odnosno da je teren pokriven snijegom, lopta mora biti crvene boje.

4. Klubovi koji ne ispunjavaju uvjete iz člana 4. "igrališta" ovih propozicija mogu u cilju provođenja takmičenja uzeti po zakup igralište nekog drugog kluba ili vlasnika potpisivanjem ugovora o korištenju igrališta, s tim da isto ispunjava uvjete člana 4. pod "igralište" ovih propozicija.

Član 6.

Takmičenjem nogometnih liga USK-a rukovodi Izvršni odbor NS USK-a putem takmičarskog organa. Način rada i odlučivanja takmičarskih organa regulisat će se posebnim pravilnikom o radu.

Član 7.

Prvenstveno takmičenje u nogometnoj ligi USK-a provodit će se po dvostrukom bod sistemu i vremenski utvrđenom kalendaru sa 2 (dvije) takmičarske polusezone- jesen i proljeće .

Kalendar i raspored takmičenja ,na prijedlog Takmičarske komisije, usvaja izvršni odbor NS USK-a najkasnije 30 /trideset/ dana prije početka jesenskog odnosno proljetnog dijela prvenstva.

Raspored utakmica za prvenstvo u okviru nogometne lige USK-a određuje se ždrijebom takmičarskih brojeva klubova sudionika i primjenom „Bergerove tablice“, koji će biti izvršen mjesec dana prije početka takmičarske godine, a zbog specifičnosti takmičenja u Nogometnoj ligi kantona taj rok izuzetno može biti i produžen.

Član 8.

Nakon utvrđenog rasporeda takmičenja za prvenstvene i kup utakmice, klubovi su obavezni u roku od 5 /pet/ dana da dostave u Sekretarijat za takmičenje:

- Naziv igrališta na kome će se igrati utakmice
- Mjesto odigravanja utakmica
- Spisak igrača za tekuću takmičarsku godinu
- Boju dresova /gaćice, majice, štucne/, kao i rezervnu boju s kojom će klub nastupati
- Dan odigravanja utakmice /subota ili nedelja/

Prije utvrđivanja vremena početka utakmice treba voditi računa o vremenskim prilikama, godišnjem dobu i pomjeranju vremena, kao i o tome da određeni termini ne budu na štetu gostujuće ekipe.

Član 9.

Klub domaćin igra utakmice u mjestu sjedišta kluba, a u nedostatku terena na drugom primljenom igralištu za koje je dobio saglasnost nadležnog organa, koji ne može biti van općine u kojoj je sjedište kluba, izuzev ako se radi o terenu koji se nalazi na području druge općine, a nije udaljen više od 50 km od mjesta sjedišta kluba.

Igralište koje klub prijavi pred početak takmičarske sezone ne može mijenjati tokom sezone, izuzev u iznimnim situacijama o kojima odlučuje takmičarski organ uz poštivanje principa regularnosti takmičenja.

Član 10.

U interesu što regularnijeg završnog dijela takmičenja, 3(tri) posljednja kola igraju se istog dana, u isto vrijeme, prema utvrđenom rasporedu takmičenja, izuzev ako nema utjecaja na tabelu, a klub domaćin ili gost imaju opravdan razlog za pomjeranje termina uz saglasnost oba kluba i komesara takmičenja.

Klub je dužan na teren doći najkasnije 90 minuta prije utakmice i nastupiti sa najboljim sastavom .

PROMIJENA TERMINA UTAKMICE

Član 11.

Promjena termina odigravanja utakmice može se vršiti na osnovu podnesenog pismenog zahtjeva zainteresiranog kluba, koji mora biti podnesen komesaru za takmičenje, najkasnije osam (8) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina utakmice s priloženom dokumentacijom iz koje se može utvrditi opravdanost podnesenog zahtjeva sa eventualnim prijedlogom za novi termin odigravanja utakmice.

U slučaju kada zahtjev za promjenu termina nije podnesen u skladu sa prethodnim stavom, komesar za takmičenje može promijeniti termin utakmice samo ukoliko je klub koji traži promjenu termina dostavio i pismenu saglasnost drugog kluba, što je moguće najkasnije tri (3) dana prije utvrđenog termina utakmice.

Kada se utakmica odlaže zbog bolesti igrača (trovanja i slično), to se može učiniti ukoliko je bolesno najmanje 7 (sedam) standardnih igrača (igrači koji su odigrali najmanje 70% utakmica) u toku tekućeg jesenjeg ili proljetnog dijela prvenstva.

Kada komesar za takmičenje dobije pismeni zahtjev kluba za odgodu utakmice zbog bolesti igrača sa kompletnom medicinskom dokumentacijom iz odgovarajuće medicinske ustanove (nalaz nadležnog specijaliste, dijagnoza, mišljenje o dužini bolovanja i sl.), donijet će odluku o odgodu utakmice.

Kada je došlo promjene termina utakmice, komesar za takmičenje će donijeti odluku da se ona odigra u prvom slobodnom terminu (ako su prestali razlozi zbog koje je utakmica odgođena), pod uslovom da svaki klub ima najmanje dva slobodna dana između odigravanja dvije utakmice.

Član 12.

Utakmice se mogu igrati samo na travnatim terenima koji su spremni za igru ukoliko ispunjavaju uslove iz člana 32. Pravilnika o nogometnim/fudbalskim takmičenjima NS/FS BiH i člana 4. Pod "igrališta" ovih Propozicija.

Klub domaćin je obavezan da teren pripremi za igru tako da bude potpuno pripremljen za odigravanje utakmice. Da li je teren pripremljen za igru ili nije odlučuje glavni sudija koji je određen da vodi utakmicu. Sudija će u zapisnik navesti da li je ili nije teren osposobljen za igru radi uzroka više sile ili zbog nemarnosti kluba domaćina.

Ako se u toku takmičenja neka utakmica ne odigra zbog neobezbeđenog terena krivicom kluba domaćina-organizatora utakmice ista se na osnovu člana 60. Pravilnika o nogometnim/fudbalskim takmičenjima NS/FS BiH ima registrovati službenim rezultatom 3:0 (par-forfe) u korist protivnika-gostujuće ekipe.

Sudija i delegat obavezni su da u zapisnik unesu zaključak o neispravnosti terena ili zaključak da teren nije bio obezbeđen. Delegat će zapisnik dostaviti nadležnom organu u roku od 24 sata, u smislu člana 35. Pravilnika o nogometnim/fudbalskim takmičenjima NS/FS BiH.

NAJMANJI BROJ IGRAČA

Član 13.

Utakmica ne može da počne ako jedan od timova nema najmanje 7 /sedam/ igrača, shodno članu 36. Pravilnika o nogometnim/fudbalskim takmičenjima NS/FS BiH i pravilu III. Pravila nogometne igre.

Igrači koji nisu upisani do početka utakmice u zapisnik, nemogu nastupati na utakmici.

Ako jedan tim za vrijeme trajanja utakmice ostane sa manje od 7 /sedam/ igrača, sudija je dužan zaustaviti igru, a ako u roku od 5 /pet/ minuta klub ne nastupi sa minimalnim brojem igrača, sudija je dužan da odsvira kraj utakmice, shodno članu 37. Pravilnika o nogometnim/fudbalskim takmičenjima NS/FS BiH i pravila III. Pravila nogometne igre.

Svaki klub prijavljuje u zapisnik 18 /osamnest/ igrača. U igri učestvuje 11 /jedanest/ prijavljenih igrača, a tokom utakmice mogu se izvršiti 3 /tri / zamjene.

Predstavnici klubova obavezni su dostaviti delegatu sastav ekipa sa ispravnim igračkim legitimacijama i licencama/akreditacijama službenih osoba kluba, najkasnije 60 minuta prije početka utakmice.

OPREMA NOGOMETAŠA/FUDBALERA

Član 14.

Ekipe na jednoj utakmici ne mogu igrati u istim ili sličnim bojama dresa.

Gostujući klub mora poštovati boju sportske opreme kluba domaćina, koja je prijavljena prije početka prvenstva u Sekretarijat saveza i objavljena u Biltenu NS USK-a.

Klub domaćin nastupa u prijavljenoj boji sportske opreme na utakmici.

Ako gostujući klub nema sportsku opremu druge boje, domaćin će mu posuditi opremu boje različite od svoje, a delegat utakmice će gostujući klub prijaviti zbog zanemarivanja obaveza i isti će snositi disciplinsku odgovornost.

Brojevi na dresovima moraju odgovarati onima na popisu igrača u Zapisniku o utakmici.

Ako su dresovi prugasti ili šareni, brojevi moraju biti na jednobojnoj podlozi.

ORGANIZACIJA UTAKMICE - DUŽNOSTI KLUBOVA

Član 15

Organizaciju utakmica vrše klubovi domaćini koji igraju na domaćem terenu.

Klub domaćin isključivo je nadležan za red i sigurnost prije, tokom i nakon utakmice i bit će pozvan na odgovornost zbog bilo kojeg incidenta, te može biti kažnjen u skladu sa odredbama Disciplinskog pravilnika NS/FS BiH.

Klub domaćin je obavezan pripremiti teren za igru, a odluku o podobnosti terena za odigravanje utakmice donosi glavni sudija.

Svaki klub dužan je na teren doći 90 minuta prije početka utakmice i nastupiti sa najboljim sastavom tima.

Ne izvršavanje obaveze ovog člana povlači disciplinsku odgovornost prema odredbama Disciplinskog pravilnika NS/FS BiH.

Član 16.

Klub domaćin dužan je delegatu utakmice staviti na raspolaganje obrazac zapisnika za utakmice i da pruži svu neophodnu pomoć pri sastavljanju zapisnika.

Zapisnik se sastavlja u zato predviđenoj prostoriji na stadionu, uz prisustvu sudaca, delegata i predstavnika klubova.

Zapisnik se sastavlja u 4 /četiri/ primjerka od kojih prva 2 /dva/ originali pripadaju delegatu, a slijedeći klubovima.

Izvještaj sa utakmice i izvještaj delegata izrađuju se po završetku utakmice. Izvještaj delegate radi delegat, a izvještaj sa utakmice glavni sudija utakmice.

Zapisnik prije početka utakmice potpisuju delegat, glavni sudija i predstavnici klubova.

Najkasnije sat prije odigravanja utakmice, ovlašteni predstavnici klubova dostavljaju delegatu utakmice na uvid nogometne iskaznice igrača koji toga dana nastupaju, kao i takmičarske akreditacije za službenog predstavnika, komesara za bezbjednost, glavnog trenera, pomoćne trenere, ljekara i fizioterapeuta.

Na klupi kluba Kantonalne lige mogu sjediti glavni trener i treneri samo sa validnom TAKMIČARSKOM trenerskom AKREDITACIJOM kao dozvolom za rad za određenu godinu. Takmičarske akreditacije glavnog trenera i trenera moraju biti propisno ovjerene i validne za 2014. godinu (prvi dio sezone) a zatim i za 2015. godinu (drugi dio sezone) od strane Centra za edukaciju kadrova N/FS BiH.

Licence službenog predstavnika, ljekara i fizioterapeuta Kantonalne lige validne su ako su izdane od strane NS USK-a za kalendarsku 2014. godinu (prvi dio sezone), a zatim i za 2015. godinu (drugi dio sezone).

Delegat je obavezan da u zapisnik upiše ime i prezime službenog predstavnika, glavnog trenera, trenera, liječnika i fizioterapeuta jedne i druge ekipe i upiše broj licence. Ako delegat utakmice utvrdi da službeni predstavnik, glavni trener, pomoćni trener, ljekar ili fizioterapeut nema odgovarajuću licencu, neće im dozvoliti da uđu u ograđeni dio terena za igru.

Delegat je obavezan prije utakmice izvršiti identifikaciju osoba u kabinama za rezervne igra, na način što će utvrditi da li se fotografije sa licenci i akreditacija podudaraju sa likom osoba, kao i da li se prijavljene osoba sa licencama zaista i nalaze u kabinama. Provjeru je potrebno izvršiti i za liječnika i fizioterapeuta.

Svaki klub prijavljuje u zapisnik 18 (osamnest) igrača. U igri sudjeluje 11 (jedanest) prijavljenih igrača, a tokom utakmice mogu se izvršiti 3 (tri) zamjene.

Član 17.

Klub domaćin dužan je da poduzme sve mjere u cilju obezbjeđenja ličnosti članova ekipe, sudija i delegata kako za vrijeme odigravanja utakmice, tako i po završetku utakmice sve do napuštanja igrališta i mjesta odigravanja utakmice.

Klub domaćin je obavezan sačekati gostujuće navijače ako organizovano dolaze (što gostujući tim treba najaviti), smjestiti ih u gledalište na posebnom mjestu i izvršiti obezbjeđenje istih u toku i poslije utakmice.

Klub domaćin je također dužan da obezbjedi odgovarajuću dežurnu redarsku službu sa dovoljnim brojem redara /najmanje 8 (osam) redara/ vidljivo obilježenih, te prisustvo pripadnika MUP-a /najmanje 2 (dva) policajca /, dežurno sanitetsko vozilo sa osobljem i nosilima (može se koristiti adekvatno osobno vozilo, kombi ili auto sa četvoro vrata-karavan/, a po potrebi i druge službe.

Bez pripadnika MUP-a, redara, sanitetskog vozila i dežurnog ljekara minimum fizioterapeuta sa odgovarajućom medicinskom opremom utakmica se neće igrati, a sadržaj medicinske opreme -torbe regulisat će se posebnom odlukom Izvršnog odbora NS USK-a.

Klub domaćin obavezan je izvršiti prijavu utakmice (javnog skupa) kod nadležne policijske uprave i delegatu utakmice dokazati da je utakmica prijavljena kod PU ili da je izdato odobrenje (shodno važećim zakonskim odredbama).

Klub domaćin obavezan je osigurati snimanje utakmice i originalni snimak zapečaćen u kovertu, odmah po završetku utakmice uručiti delegatu utakmice, koji ne smije snimak pregledati nego ga je zapečaćenog dužan dostaviti takmičarskom organu zajedno sa zapisnikom utakmice.

U slučaju da klub domaćin ne osigura snimanje utakmice i ne postupi u skladu sa naprijed navedenim u predhodnom stavu bit će kažnjen novčanom kaznom u iznosu od 100,00 KM i snosit će disciplinske posljedice u skladu sa odredbama Disciplinskog pravilnika NS/FS BiH.

Klub domaćin obavezan je omogućiti snimanje utakmice gostujućoj ekipi, ako to isti zahtijevaju.

Za nepoštovanje obaveza, protiv kluba domaćina primijenit će se disciplinske mjere po odlukama Disciplinskog pravilnika NS/FS BiH i posebnoj Odluci Izvršnog odbora NS USK-a.

Klubovi su odgovorni za ponašanje svojih navijača, službenih osoba, članova i navijača i svake druge osobe koja obavlja dužnost na utakmici u ime kluba.

SLUŽBENI PREDSTAVNIK KLUBA :

Član 18.

Svaki klub na utakmicama stalnog takmičenja mora odrediti službenog/zvaničnog predstavnika kluba. Predstavnik kluba mora prisustvovati redovnim seminarima NS USK-a i mora biti akreditiran od strane NS USK-a.

KOMESAR ZA BEZBJEDNOST / VODITELJ OSIGURANJA:

Član 19.

Klub organizator je dužan odrediti voditelja osiguranja/komesara bezbjednosti, kao osobu nadležnu za sva pitanja bezbjednosti i sigurnosti na stadionu u sklopu organizacije utakmice. Voditelj osiguranja/komesar bezbjednosti mora prisustvovati redovnim seminarima NS USK-a i mora biti akreditiran od strane NS USK

PRAVO NASTUPA IGRAČA NA UTAKMICI

Član 20.

Na prvenstvenim utakmicama mogu nastupati igrači koji su stekli pravo igranja prema odredbama Pravilnika o registraciji, statusu i transferu NS/FS BiH, ukoliko su navršili 17 godina života, kao i igrači koji su navršili 16 godina, ali sa obaveznim specijalističkim ljekarskim pregledom kojim se proglašava sposobnim za nastupanje na utakmicama seniorskog pogona.

Odobrenje se mora ovjeriti u nadležnom savezu, a vrijedi četiri mjeseca od dana izdavanja. Ukoliko im je to pravo potvrđeno od nadležnog organa i isto mora biti upisano u nogometnu legitimaciju.

U satavu prijavljenog tima mora se nalaziti najmanje 5 /pet/ igrača mlađih od 21 godine života od kojih 3 /tri/ moraju započeti utakmicu.

Za takmičarsku 2014/2015 godinu kao mlađi od 21 godine života smatraju se igrači rođeni 01.01.1993. godine i mlađi.

Shodno članu 32. stav 3. Pravilnika o registraciji NS/FS BiH, u toku takmičarske sezone klub može po osnovu ustupanja registrirati najviše četiri igrača, s tim što najviše tri mogu nastupiti na jednoj utakmici.

IDENTITET IGRAČA

Član 21.

Na svim prvenstvenim utakmicama igrači moraju imati uredne sportske legitimacije izdate od nadležnog organa za registraciju, sa ovjerenom članarinom za tekuću godinu.

Protiv kluba koji ne poštuje ove odredbe povest će se disciplinski postupak prema odredbama Disciplinskog pravilnika NS/FS BiH, a klub može imati disciplinske i takmičarske posljedice.

Na prvenstvenim utakmicama mogu nastupati samo igrači čiji je identitet utvrđen putem nogometne legitimacije izdate od nadležnog organa za registraciju, a u slučaju njenog nedostatka, identitet će se utvrditi na osnovu javne isprave- lične karte ili pasoša i u tom slučaju, delegat će u prvu stranu zapisnika obavezno upisati broj lične karte ili pasoša, a u izvještaj i sve ostale relevantne podatke (matični broj, datum rođenja i dr.)

Ukoliko se identitet igrača utvrđuje na osnovu javne isprave klub je obavezan Komisiji za takmičenje (Komesaru) NS USK-a dostaviti sportsku legitimaciju u roku od 24 sata.

Identitet se utvrđuje prije početka utakmice. Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora na poluvremenu i neposredno po završetku utakmice.

Član 22.

Svaki igrač mora imati sportsku iskaznicu sa ubilježnim datumom i ovjerenim ljekarskim pregledom (pečat) od strane Zdravstvene ustanove koja je određena za pregled sportista. Izuzetno, može imati zvaničnu ljekarsku potvrdu (sa tačnim datumom i pečatom ljekara i ustanove) o izvršenom ljekarskom pregledu u navedenoj zdravstvenoj ustanovi, što se može primijeniti izuzetno i samo za jednu utakmicu nakon čega pregled mora biti upisan u legitimaciju.

Ljekarski pregled važi 6 (šest) mjeseci, a za igrače mlađe od 17 godina 4 (četiri) mjeseca.

Igrač koji nije upisan u zapisnik utakmice, ili koji nije izvršio ljekarski pregled, ne može nastupati na prvenstvenim utakmicama.

Protiv kluba i igrača koji prekrši odredbe ovog člana bit će pokrenut disciplinski postupak prema odredbama Disciplinskog pravilnika N/FS BiH.

NEDOLAZAK NA UTAKMICE, NEODIGRAVANJE, PREKID UTAKMICE I NENASTUPANJE RADI SUSPENZIJE

Član 23.

Protiv kluba koji ne nastupi na prvenstvenoj utakmici, koji izazove prekid utakmice, napusti teren ili ne nastupi zbog suspenzije, postupit će se prema odredbama Pravilnika o nogometnim/fudbalskim takmičenjima NS/FS BiH i Disciplinskog pravilnika NS/FS BiH.

Ove odredbe primjenjivat će se i protiv igrača, ukoliko učine prekršaj iz predhodnog stava.

Ako u roku od 15 /petnaest/ minuta od određenog vremena za početak utakmice stalnog takmičenja jedan tim ne nastupi sa potrebnim brojem igrača sudija će saopštiti kapitenu tima koji je nastupio da se utakmica neće odigrati i to će upisati u zapisnik.

Izuzetno, u slučajevima da klub nije mogao da nastupi usljed više sile, sudija će sačekati i nešto duže, ali će voditi računa o tome da utakmica može da se završi na vrijeme.

Ukoliko je utakmica prekinuta iz razloga više sile, a prije isteka 80% regularnog vremena ili nije odigrana, utakmica će se odigrati narednog dana u isto vrijeme, a ako se ne može odigrati ni narednog dana, takmičarski organ će utvrditi novi termin za odigravanje utakmice.

Ekipe koje dva puta u toku cijelog prvenstva neopravdano ne ode na utakmicu automatski se isključuje iz takmičenja, uz zabranu nastupa u naredne dvije takmičarske sezone.

Ekipe koje jednom neopravdano ne ode na utakmicu gubi istu službenim rezultatom 3:0, te se kažnjava oduzimanjem 3 (tri) boda i novčanom kaznom u iznosu od 300,00 KM (tristotina KM).

DELEGAT UTAKMICE

Član 24.

Za sve prvenstvene utakmice, nadležni organ (komesar za takmičenje) određuje delegate koji imaju vrhovni nadzor na utakmici i koji zastupaju takmičarski organ

Nakon delegiranja, delegat dobija nalog Sekretarijata takmičenja putem pošte ili putem Interneta, u čijem sadržaju mora biti navedeno mjesto, datum i sat odigravanja utakmice, podaci o sucima, te troškovi koji im pripadaju.

U slučaju da na utakmicu ne dođe određeni delegat dužnost delegata obaviti će sudac susreta.

Listu delegata čine članovi organa Saveza, sportski radnici i bivše sudije, a način izbora i kriterije za izbor delegata utvrđuje Izvršni odbor NS USK-a posebnom odlukom.

Delegati (aktivni igrači i treneri) ne mogu obavljati dužnost delegate na istom rangu takmičenja na kojem zvanično igraju i obavljaju trenersku dužnost.

Delegat je dužan sat i pol prije odigravanja utakmice održati sastanak u prisustvu predstavnika klubova, sudija utakmice, komesara bezbjednosti, vođe patrola policije i drugih sa ciljem uvida u stanje igrališta, svlačionica igrača i sudija, servisa prve pomoći, stanja bezbjednosti i dr.

Delegat je obavezan da ovjeren spisak od strane kluba sa imenom i prezimenom komesara bezbjednosti, policije, redara, sakupljača lopti, nosača nosila, uz zapisnik, dostavi takmičarskom organu.

Delegat utakmice dužan je da u roku od 24 sata po odigranoj utakmici dostavi zapisnik utakmice /prva strana/ i izvještaj sudije /druga strana/ u kancelariju NS USK-a putem faks broja: 037-220-283.

Delegat utakmice upisuje brojanu ocjenu sudijama na prvoj strani Zapisnika, kao i opisnu ocjenu u delegatskom izvještaju.

Ukoliko na utakmici dođe do incidenta, prekida utakmice i sl. delegat je obavezan u roku od 24 sata dostaviti dopunsko izvješće, a na zahtjev Komisije ili Sekretarijata i u drugim situacijama. Na poziv Sekretarijata ili takmičarskog organa delegate je dužan izvještaj ili dopunski izvještaj dostaviti i ranije.

Klub Kantonalne lige NS USK-a je obavezan da na svim domaćim utakmicama ima licenciranog komesara za bezbjednost, licenciranog službenog predstavnika kluba i fizioterapeuta, a u protivnom automatski snosit će disciplinske sankcije – kaznit će se novčanom kaznom u iznosu od 50,00 KM (pedesetKM), što je delegat utakmice dužan konstatovati i upisati u delegatski izvještaj.

SUCI UTAKMICE

Član 25.

Prvenstvene utakmice nogometne lige kantona mogu suditi samo kantonalne sudije ,kao i sudije sa viših lista kada Komesar za takmičenje smatra da se radi o utakmici koja je derbi, utakmici visokog rizika i sl., a koji se nalaze na listama verifikovanim od strane Izvršnog odbora NS USK-a.

Liste predlaže Komisija za sucei suđenje NS USK-a.

Određivanje sudija vrši nadležni takmičarski organ kojeg imenuje Izvršni odbor NS USK-a.

Nakon određivanja sudac dobija “nalog za suđenje” (lično u kancelariji saveza, putem internet portala NS USK-a), u kojem se navode svi podaci za obavljanje dužnosti (ekipe, mjesto, datum i vrijeme odigravanja utakmice, imena službenih lica, podatke za naplatu troškova).

Sudije-aktivni igrači ili treneri ne mogu suditi na istom rangu takmičenja na kojem zvanično igraju ili vode ekipu.

Član 26.

Sudac utakmice je dužan da prije početka utakmice pogleda i odluči da li je teren pogodan za igru ili nije. Ako sudija utvrdi da je teren nepododan za igru, to konstatuje u zapisnik u skladu sa članom 35. Pravilnika o nogometnim/fudbalskim takmičenjima NS/FS BiH i o tome obavijesti na sastanku koji drži delegat utakmice prije početka utakmice.

Sudac je dužan da prije početka utakmice potpiše prvu stranu zapisnika.

Sudac je dužan da poslije utakmice ispunji sve relevantne podatke u sudačkom izvještaju ,da unese sve primjedbe kao opomenute i isključene igrače, daga potpiše i preda delegatu utakmice, koji će isti dostaviti Sekretarijatu takmičenja zajedno sa svojim izvještajima.

Ukoliko delegirani sudac ne dođe na utakmicu istu će suditi prvi pomoćni sudac, a ako on ne dođe suditi će drugi pomoćni sudac.

Ukoliko na utakmicu ne dođe ni jedan od delegiranih sudaca, klubovi će se sporazumiti da utakmicu sudi jedan od prisutnih sudaca. Ako sporazum između klubova ne bude postignut ,onda će delegate odlučiti koji će od prisutnih sudaca suditi utakmicu.

Sporazum o izboru suca mora biti pismeno utvrđen prije početka utakmice. Zapisnik o sporazumu potpisuju oba kapiteana, predstavnici klubova i delegat.

Ako se klubovi nisu sporazumjeli o izboru suca, pa je istog odredio delegate, to se mora konstatovati u posebnom zapisniku sa utakmice koji je sastavni dio zapisnika.

Ukoliko na utakmicu ne dođe jedan ili obojica pomoćnih sudaca glavni sudac će odlučiti o izboru pomoćnih sudaca.

Protiv sudije koji ne dođe na zakazanu utakmicu povest će se disciplinski postupak prema odredbama Disciplinskog pravilnika NS/FS BiH.

SUSPENZIJA

Član 27.

Suspendovani tim, odnosno svi timovi suspendovanog kluba ne mogu nastupati na prvenstvenim utakmicama sve dok traje suspenzija.

Sve odigrane utakmice u vrijeme suspenzije, izrečene zbog neizvršavanja pravosnažnih odluka nadležnih organa ili neizvršavanja nespornih obaveza nastali iz takmičenja predviđenih ovim Propozicijama registrirat će se rezultatom 3:0 /par-forfe/u korist protivnika.

Ostale utakmice na kojima suspendovani tim nije mogao nastupiti do donošenja konačne odluke o nekom spornom slučaju neće biti registrovane sve dok se ne donese konačna odluka. Po donošenju konačne odluke klub je dužan odigrati utakmice prema rasporedu nadležnog takmičarskog rukovodstva.

Ako suspendovani tim nastupi na javnoj utakmici pokrenut će se disciplinski postupak prema odredbama Disciplinskog pravilnika NS/FS BiH ,s tim da će klub snositi takmičarske posljedice ukoliko je na utakmicu uložena žalba prema odredbama Pravilnika o nogometnim/fudbalskim takmičenjima NS/FS BiH.

Klub koji nastupi protiv suspendovanog ili kažnjenog kluba, ukoliko je blagovremeno obaviješten o suspenziji ili kazni, snosit će disciplinske posljedice u skladu sa odredbama Disciplinskog pravilnika NS/FS BiH .

ŽALBE I ODLUČIVANJE PO ŽALBAMA

Član 28.

O regularnosti utakmice stalnog takmičenja može se rješavati na osnovu žalbe oštećenog kluba i izvještaja službenih lica.

Pod oštećenim klubom u smislu predhodnog stave podrazumijeva se svaki klub koji je oštećen rezultatom utakmice na koju se ulaže žalba.

Žalbe po svim osnovama moraju se telegrafski ili faxom najaviti u roku od 24 sata po odigranoj utakmici, a obrazloženje sa dokazom o uplaćenju taksu potvrđenoj odlukom Izvršnog odbora NS USK-a i ovim Propozicijama, ima se dostaviti u roku od 3 /tri / dana od dana odigravanja utakmice.

Ukoliko rok za najavu i ulaganje žalbe ističe u nedjelju ili na državni praznik ,rok za najavu i ulaganje žalbe produžava se za prvi naredni radni dan.

Žalba se dostavlja Komisiji za takmičenje u dva primjerka.

Član 29.

Neblagovremeno najavljene, neobrazložene, netaksirane ili nedovoljno taksirane žalbe neće se uzimati u postupak, već će se odbaciti, a utakmica će se registrovati postignutim rezultatom.

Odluke o uložnim žalbama bit će donijete u roku od 8 /osam/ dana od dana prijema žalbe.

Član 30.

Za utakmice o žalbama u prvom stepenu odlučuje Komisija za takmičenje.

Član 31.

Žalba na prvostepenu odluku može se podnijeti Apelacionoj komisiji NS USK-a u roku od 8 /osam/ dana od dana prijema pismene odluke prvostepenog organa.

Drugostepena odluka mora biti donesena u roku od 8 /osam/ dana od dana prijema žalbe .

Drugostepena odluka je konačna.

Protiv odluke drugostepenog organa može se podnijeti zahtjev za preispitivanje odluke Izvršnom odboru NS USK-a u roku od 8 /osam/ dana od dana prijema odluke drugostepenog organa.

Izvršni odbor NS USK-a će po zahtjevu kluba rješavati u roku od 15 /petnaest/ dana računajući od dana prijema istog uz obavezno predhodno mišljenje Komisije za propise /član 79. Pravilnika o nogometnim/fudbalskim takmičenjima NS/FS BiH/.

Član 32.

Takse na žalbe u prvom i drugom stepenu vezane za Pravilnik o nogometnim takmičenjima NS/FS BiH, Disciplinski pravilnik NS/FS BiH i preispitivanje odluke pred Izvršnim odborom NS USK-a su slijedeće:

- Taksa u prvom stepenu za klub iznosi.....200,00 KM
- Taksa u drugom stepenu za klub iznosi 400,00 KM
- Taksa za pojedince iznosi 50% od takse koju plaćaju klubovi.

Eventualne troškove žalbenog postupka snosi klub koji ih je prouzrokovao.

Sredstva od naplaćenih taksu za žalbe pripadaju prihodima NS USK-a.

REGISTRACIJA UTAKMICA

Član 33.

Ako na utakmicu nije uložena žalba, a ne postoje uvjeti za registraciju po službenoj dužnosti sa 3:0 / par-forfe /, utakmica se registruje postignutim rezultatom.

Ako je prvostepena odluka pravosnažna ili je donesena drugostepena odluka koja je konačna, jednom registrovana utakmica ne može biti poništena, izuzev u postupku pred Izvršnim odborom NS USK-a.

Komesar za takmičenje vrši registraciju odigranih utakmica najkasnije u roku od 21 /dvadesetjedan/ dan od dana odigravanja utakmice i svoje odluke objavljuje u službenom biltenu i na internet stranici Saveza.

Ako je uložena žalba ,rok za registraciju utakmice produžava se do konačne odluke.

DISCIPLINSKE ODREDBE

Član 34.

O disciplinskim prekršajima igrača, službenih predstavnika (trener, fizioterapeut, zvanični predstavnik kluba, komesar za bezbjednost/ i klubova koji učestvuju u takmičenju odlučuje se osnovu Disciplinskog pravilnika NS/FS BiH i posebnih odluka IO NS USK-a.

Prvostepene odluke o disciplinskim prekršajima donosi nadležni Disciplinski sudija NS USK-a u roku od 8 /osam / dana po odigranoj utakmici, odnosno podnesenoj prijavi.

Drugostepene odluke po žalbama na odluke disciplinskog sudije NS USK-a donosi Apelaciona komisija, a žalba ovom organu podnosi se u roku od 8 (osam) dana nakon prijema pismene prvostepene odluke putem prvostepenog organa.

Drugostepeni organ će svoje odluke donijeti u roku od 8 (osam) dana računajući od dana prijema žalbe.

Disciplinske odluke o disciplinskim prekršajima su konačne.

Protiv odluke drugostepenog organa, može se podnijeti prijedlog za ponavljanje postupka Izvršnom odboru NS USK-a u roku od 8 (osam) dana od dana prijema pismene odluke drugostepenog organa. Prijedlog za ponavljanje postupka podnosi se putem Komisije za propise koja je obavezna dati svoje mišljenje.

Izvršni odbor NS USK-a će prijedlog riješiti u roku od 30 (trideset) dana.

Automatska kazna zabrane igranja jedne prvenstvene ili kup utakmice nastaje poslije svake 3 (treće) javne opomene koju igrač dobije na prvenstvenoj ili kup utakmici u toku jedne takmičarske godine, a automatski prestaje poslije prvenstvene ili kup utakmice na kojoj je igrač morao da pauzira pa i u slučaju nastupa igrača pod automatskom kaznom na toj utakmici.

Javne opomene (žuti) kartoni radi koji je igrač dobio crveni karton ne evidentiraju se, evidentira se samo crveni karton.

UTVRĐIVANJE PLASMANA

Član 35.

Plasman klubova na tabeli utvrđuje se prema odredbama člana 42. Pravilnika o nogometnim takmičenjima NS/FS BiH.

VRIJEME TRAJANJA UTAKMICE

Član 36.

Utakmice se igraju dva puta po 45 (četrdesetpet) minuta. Odmor između poluvremena traje 10-15 minuta.

Ova odredba je u skladu sa Pravilima nogometne igre.

FINANCIJSKE ODREDBE

Član 37.

Svaka prvenstvena utakmica podliježe troškovima koje snosi klub domaćin, a troškovi se isplaćuju na osnovu priloženog naloga NS USK-a.

Sudijama i delegatu utakmice isplaćuju se slijedeći troškovi: taksa za suđenje i putni troškovi.

Taksa za službena lica utakmice iznosi :

- delegat utakmice..... 60,00 KM
- glavni sudija utakmice 60,00 KM
- pomoćni sudija – prvi asistent utakmice..... 50,00 KM
- pomoćni sudija – drugi asistent utakmice 50,00 KM

Obračun putnih troškova prevoza do mjesta odigravanja utakmica i nazad za svako kolo vrši tehnički sekretar NS USK-a, a na osnovu Odluke Izvršnog odbora NS Unsko-Sanskog kantona. Ako službena lica dolaze na utakmicu u mjesto sa područja iste opštine, nemaju pravo na naknadu putnih troškovova do 10 kilometara.

Sve isplate vrše se poslije utakmice.

Klubovi koji uplatu troškova utakmice vrše putem žiro računa, dužni su troškove uplatiti svakoj službenoj osobi pojedinačno na njivo tekuće žiro račune, u roku od 48 sati po odigranoj utakmici.

Ukoliko klub ne isplati službena lica ili ih djelomično isplati, dužan je iste uplatiti najkasnije do naredne utakmice, te su dokaz o uplati dužni dati na uvid delegatu na prvoj narednoj prvenstvenoj ili kup utakmici.

Neispunjavanje finansijskih obaveza u datom roku prema službenim licima, nastupa automatska suspenzija kluba, i ista povlači disciplinske posljedice u skladu sa odredbama Disciplinskog pravilnika NS/FS BiH.

U slučaju da utakmica nije odigrana iz razloga za koji službena lica ne snose krivicu, a doputovali su u mjesto odigravanja i na stadion, pripadaju im putni troškovi shodno odluci IO NS USK-a.

Član 38.

Ostali troškovi takmičenja padaju na teret svih klubova kao vid kotizacije koju treba uplatiti prije početka takmičenja. Kotizacija za cijelo takmičenje iznosi 800,00 KM, a odnosi se na troškove vođenja utakmica i druge prateće izdatke vezane za takmičenje i rada Nogometnog saveza.

Svaki klub je dužan prvi dio kotizacije od 400,00 KM (50%) uplatiti prije početka takmičenja, a drugi dio na početku proljetnog dijela takmičenja u 2015. godini.

Klub koji ne uplati kotizaciju za takmičenje biće suspendovan i snosiće disciplinske posljedice po odredbama Disciplinskog pravilnika NS/FS BiH.

POSEBNE ODREDBE

Član 39.

Taksa na žalbe po bilo kojem osnovu iz Propozicija za klubove članove NS USK-a i pojedince uplaćuje se na žiro račun NS USK-a broj: 338-500-22005184-45 Unicredit Zagrebačka banka.

Član 40.

Prvaku NS USK-a obavezno se dodjeljuje pehar u trajno vlasništvo, a na prijedlog Komisije za takmičenje Izvršni odbor NS USK-a može donijeti odluku o dodjeli i druga priznanja i nagrada.

Odluke o dodjeli pehara, raznih priznanja i o dodjeli nagrada donosi Izvršni odbor NS USK-a, a na prijedlog Komisije za takmičenje .

Član 41.

Za vrijeme odigravanja prvenstvenih i kup utakmica u igralištu pored terena za igru, u zaštićenim kabinama, mogu se nalaziti slijedeća lica:

1. predstavnik kluba sa odobrenjem kluba i licencom NS USK-a,
2. šef stručnog štaba sa ispravnom legitimacijom trenera NS USK-a i licencom,
3. trener kluba sa ispravnom legitimacijom trenera NS USK-a i licencom,
4. pomoćni trener sa ispravnom legitimacijom trenera NS USK-a i licencom,
5. rezervni igrači u sportskoj opremi: 7 /sedam/,
6. ljekar kluba sa ispravnom legitimacijom NS USK-a,
7. fizioterapeut sa ispravnom legitimacijom NS USK-a i licencom.

POPUNJAVANJE LIGE

Član 42.

Prvoplasirana ekipa iz nogometne lige kantona ostvaruje plasman u drugu ligu NS F BiH grupa "zapad". Popunjavanje nogometne lige kantona NS USK-a vrši se sa klubovima koji napuštaju drugu ligu NS F BiH grupa "zapad" i uključivanjem novoformiranih ili aktiviranjem rada ranije postojećih klubova koji ispunjavaju uslove iz Propozicija takmičenja NS USK-a.

ZAVRŠNE ODREDBE

Član 43.

Za sve što nije predviđeno ovim Propozicijama važe odredbe Pravilnika o nogometnim/fudbalskim takmičenjima NS/FS BiH, odredbe Disciplinskog pravilnika NS/FS BiH i odredbe ostalih normativnih akata NS/FS BiH i NS F BiH .

Član 44.

Izmijene i dopune ovih Propozicija vrše se prema istom postupku, kao i njihovo donošenje. Stupanjem na snagu ovih Propozicija prestaju važiti odredbe ranijih Propozicija.

Član 45.

Ove Propozicije stupaju na snagu danom donošenja, a primjenjuju se za takmičarsku 2014/2015 godinu i objavit će se u Biltenu NS USK-a.

TAKMIČARSKA KOMISIJA
Asim Selimović, s.r

IZVRŠNI ODBOR NS USK-a
Amir Hadžić, s.r